



FASNACHT 2017
Lälli Stamm

MENSCH, WAS MACHSCH !?!?

E kalti Nacht mit Minusgrad,
s Schlachtfäld wird zum Lyychebad,
e Trümmerhuffe us vvyll Stei:
nüt isch me doo vo sym Dehei.
E Huus duet langsam abebrenne
und d Lüt dien paanisch ummerenne.
Am Bode liige Bei und Ärm
und driiber Räschte vo Gedärm.
Ganz drunter sin no Drägg und Schärbe –
Wie vvyll hän do ächt miesse stärke?

E baar Daag spöter, frieh am Morge
blooge d Lüt die glyyche Sorge.
«Mir stöhn jetz wirgglig schytter do!
Wie wird s mit uns ächt wyter go?
S Läbe vo uns isch fascht zerstört!
Het kaine unsri Stimme ghört?
Mir unde hän s scho lang gseh ko,
Doch obe hän si s schlyffe lo.
Mir hän, und das bringt uns s Verdärbe,
zum Lääbe z'weenig, z'vvyll zum Stärbe.»

Worum isch s zue däm denn ko?
Wieso stoht s um uns hüt eso?
Es het is gfählt an Menschligkeit,
d Gsellschaft, die het grob verseit.
Si hän drum alles lo passiere,
au ohni nur e bitz z agiere.
Supermächt, wo Kreft dien mässe,
dass s andri killt, das goht vergässe,
die danke nid an d Konsequänze,
defir nur an die aigne Gränze

Als Uswirgig vom grosse Knall
folgt druf e riise Widerhall:
Schrägge, Kämpf und Katastrophe,
e Bild, ab däm me nimm ka schlofe.
Eländ, Dood und ganz vvyll Klaage,
doch de Lätze goht s an Kraage.
Die Lüt, wo me do miessti biesse,
sin nit die, wo hän lyyde miesse.
Es goht am Änd halt nur um Macht,
drbyy isch s glyyich, ob s neume kracht.

Jetzt stöhn mir do und sin verstuunt
und irgedwie nimm so guet gluunt.
Zwoor hän mir s Schlimmschti überstande,
doch Zfriedeheit isch nit vorhande,
zue sehr het uns dä Krieg zuegsetzt;
au hütte sin mir no entsetzt.
Bilder, wo me im Kopf duet bhalte
und z Oobe eim vom Schloof abhalte.
Me het erfahre, Krieg isch grässlig,
doch noonem Kampf blybt s wyter hässlig.

Es wär doch scheen, wenn noo däm Beebe
me wurd ab jetze zämmeheebe.
Gmeinsam sott me jetz probiere,
d Zuekunft guet und neu z kreiere.
Denn kasch d Findschafte überwinde,
wirsch so au neyi Frinde finde.
Jä bruuchts denn wirgglig en Entsetze,
bevor me sich duet zämmeetze?
Im Geegedail, statt d Kralle z wetze,
sott me sich langsam afoh schetze.

Mir Mensche sötten is fescht schämme,
well mir is eifach lätz benämme.
Mir reede, ohni ebbis z mache,
und leen drbyy e Krieg entfache.
Doch duet s dr ainti kuum fescht kratze,
wenn d Bombe wird bym andre blatze.
Drum sott me jetz kei Zyt verschwände,
well jede weiss, wie s denn wird ände.
Isch d Zuekunft für dii nimme ghüür,
syg muetig und gib Geegestüür.

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde
und dr Rädäbäng kaufe.

Am Fritig und Samschtig, 10. und 11. März 2017 isch
Noochwuggswärbig vo dr 1. Lektion im Zält uff em Barfi.

D'Zeedelläasete isch am Sunntig noo dr Fasnacht 2017
am 12. Meerz vom Fimfi bis am Siibeni zoobe,
in dr Baseldytschi Bihni (im Lohnhof).
Dr Ytritt isch vergäabe. D Foyer-Bar isch
vom Vieri ewäg offe.

MUESCH Z EIRSCHT S ENTSCHLIESSEN KENNENLEIERE,

ZIEM FRIIDIE KENNIE SCHÄTZIE Z LEIERE?